

新元史

列傳

第一百三十至第一百三十四

第伍拾陸冊

列傳第一百三十

新元史卷之二百三十三

賜進士出身日講起居注官翰林院侍讀國史館纂修膠州柯劭忞撰

忠義四

伯顏

朱春 谷廷珪

買住

張鳳儀 鳳儀子萬里

熊義山 羅邦佐

曹彥可

陳道夫 呂復

梅實 堵簡

囊果歹 完者都 趙資

周冕

劉公福 羅輝

王成

游宏道

木薛飛 德

羅武

王英

普顏不花

申榮

閔本

拜住

趙宏毅

恭 張正蒙

徐獠頭

新元史卷一百三十三 列傳

董嘒 鄧烈

朴賽因不花 張庸
段楨

郭庸

丁好禮

朱公選

孫德謙

葉蘭

張昶

伯顏子中

王翰

蔡子英

狄琮

夏侯元

伯顏一名師聖字宗道哈刺魯氏世居開州濮陽縣伯顏生三歲常以指畫地或三或六若爲卦者六歲授孝經論語卽成誦稍長受業宋進士建安黃坦坦曰此子

穎悟過人非諸生可比因命以顏爲氏且名而字之久
之坦辭曰余不能爲爾師羣經有朱子說具在歸而求
之可也至正四年以隱士徵至京師授翰林待制預修
金史旣畢辭歸已而復起爲江西廉訪僉事數月以病
免及還四方來學者至千餘人十八年河南賊蔓延河
北伯顏言於省臣將結鄉民爲什伍以自保俄賊兵大
至伯顏乃渡漳水北行鄉人從之者數十萬至磁州與
賊遇賊知伯顏名士生劫之以見賊將誘以富貴伯顏
罵不屈引領受刃與妻子俱死之年六十四人或破其
腹見其心數孔曰古稱聖人心有七竅此非賢士乎乃

覆牆而拚之有司上其事贈奉議大夫僉太常禮儀院
事諡文節太常諡議曰以城守論之伯顏無城守之責
而死可與江州守李黼一律以風紀論之伯顏無在官
之責而死可與西臺御史張桓並駕以平生有用之學
成臨義不奪之節乃古之所謂君子人者時以爲確論
朱春佚其籍貫三原尹明兵克奉元春謂其妻曰吾當
以死報國妻曰君盡忠吾豈不能盡節俱投厓死同時
谷廷珪襄陽尹鐵木哥兵入境官吏皆遁廷珪與主簿
張德獨不走被執不降死之
買住韶州路同知以廉介聞至正間郴賊陷樂昌買住

率義兵敗賊復樂昌乳源諸縣寢疾歿於軍中郡人義而祀之經歷張鳳儀率義兵追賊兵潰被執不屈死子萬里獲賊酋劈其肝食之尋補父官及贛賊圍城出戰被數創罵賊而死

熊義山安鄉人累官至萬戶倪文俊兵至執縣尹張繼和義山保黃山砦一縣歸之又二年文俊襲陷之逼使降義山罵不絕口文俊剖其腹殺之又羅邦佐石城人平海寇授廉州總管子震敦化州總管次子奇曹州路同知子奇子元廉州路同知一門父子兄弟皆死節曹彥可亳州人妖賊起羣至彥可門逼之寫旂彥可罵

曰我儒者知有君父甯死耳肯從汝輩耶遇害賜諡節愍同時陳道夫懷甯人余闕辟爲懷甯尹屢抗賊城陷死之梅實宣城人集慶路總管府照磨至正中明兵圍城乃會友人李端曰事急矣當以死殉國城陷合門遇害又呂復福清人攝長樂縣尹明兵入福州復曰學古世食君祿不以死報國無以見先人於地下自縊死又堵簡字無傲金壇人善詩歌元末爲江浙行省檢校官平章慶童辟爲參議兵敗爲賊所執不屈死

囊果歹四川行省平章政事明玉珍據重慶囊果歹與右丞完者都參知政事趙資各以兵次嘉定之大佛寺

規復重慶玉珍使其弟明二攻之相持半年玉珍遣明
二倍道趨成都陷之獲囊果万趙資妻子送於玉珍囊
果万之妻謂舟人曰吾家三世受羊皮宣命吾爲平章
夫人今遭辱如此何面目見祖宗於地下遂自沉於江
趙資妻至玉珍待以禮資方守凌雲山因諷妻招資降
將戰玉珍驅資妻陣前攜子呼資曰妾與鎖兒受擒明
元帥待妾母子以禮君宜早歸以全妾母子之命子亦
呼父救號泣兩軍莫不墮淚資控馬彎弓厲聲曰癡婦
汝不死何待汝不見平章夫人耶一矢殪之復欲射其
子兵擁去獲免玉珍揮兵進戰官軍大敗完者都囊果

新元史卷三十三 列傳
方趙資皆被執王珍勸之降囊果方曰我元之懿親固
無降理一死之外尙何言也資曰吾爲參政不能平賊
罪不容於死敢助賊乎惟速死爲幸完者都惟俯首長
吁而已後皆爲玉珍所殺蜀人謂之三忠

周冕字時中廬陵龍湖人少讀書自負奇偉由文學起
家至連山縣尹以廉介稱賀州峒賊周滿反官兵討之
不克曰周縣尹來卽降冕往賊羅拜迎降厯官亞中大
夫廣東宣慰使至正中監郡納速兒丁起冕及前松江
府同知劉公福領兵至龍湖賊大至陽使人納款冕開
懷受之遂遇害公福亦死之納速兒丁立祠祀之又廬

陵人羅輝字明遠以字行性倜儻好義聞紅巾賊至卽散家財招死士爲戰守計賊攻吉安明遠率敢死士三百餘人與賊戰於城東賊敗走郡城立復明遠陣歿王成雷州人素驍勇號帽兒王猺賊時或侵境成常戴一皮帽先登陷陣猺賊輒奔潰他人或戴其帽臨陣賊亦駭走猺賊侵雷州元帥張不兒罕字溫率所部禦之賊間道徑至城下官軍還救成先驅連斬數賊大破之恃勝不設備餘賊發毒矢中成而卒軍民附祀成於黑神祠

游宏道江西人通判化州爲政廉而不苛九年海賊犯

合浦宏道出貲購賞率義兵吳川張友明等七百餘人
會諸郡兵禦賊於澄邁之石獲港友明等戰甚力俄而
獠兵鳧水走賊乘勝圍之宏道與主簿木薛飛同知羅
武德及張友明俱戰死

王英字邦傑益都人性剛果有大節膂力絕人善騎射
襲父職爲莒州翼千戶父子皆用雙刀人號曰刀王至
元二十九年江西行樞密院檄討南雄賊丘太老賊突
至英力戰大破之斬其渠帥劉把東元貞元年從左丞
董士選討大山賊劉貴擒之延祐二年甯郡賊起行省
檄英率各萬戶軍討之英屢戰皆勝斬獲甚多行省平

章李世安遣英迂江浙平章張閭於境上至木麻坑擒賊蔡五九又追賊至上虎嶂遇賊三千餘人盡殲之至治元年以大臣薦授忠武校尉益都淄萊萬戶府副萬戶天厯元年授宣武將軍至順二年行省檄英招捕桂陽州賊張思進等二千餘人英布以威信皆相率請降元統元年授懷遠大將軍同知海北海南道宣慰使司事至元三年萬安軍賊吳汝期等作亂英至賊皆就擒未幾李志甫起漳州劉虎仔起潮州詔江西行省右丞燕帖木兒討之時英已致仕平章政事伯撒里謂僚佐曰非刀王行不能平此賊其人雖老可以義激乃使迎

致之及賊平英功居多至正中毛貴陷益都英年九十有六乃謂其子弘曰吾老不能報天子忍食異姓之粟以求生乎水漿不入口者數日遂卒毛貴聞之使具棺衾以葬將斂舉其尸不動焚香祝曰公子弘請公歸葬先塋祝畢尸遂起觀者莫不驚異山東宣慰使及憲司請恤典於朝有曰不食寇粟餓死芹泉有夷齊之風芹泉谷英所居也

普顏不花字希古蒙古氏倜儻有大志至正五年由國子生登右榜進士第一人授翰林修撰調河南行省員外郎十一年遷江西行省左右司郎中蘄黃賊徐壽輝

來寇普顏不花戰守之功爲多十六年除江西廉訪副使頃之召還授益都路達魯花赤遷山東廉訪使再轉爲中書參知政事十八年詔與治書侍御史李國鳳同經略江南至建甯江西陳友諒遣鄧克明來寇平章政事阿魯溫沙等皆夜遁國鳳時分鎮延平城陷遁去普顏不花曰我承制來此去將何之誓與此城同存亡耳命築各門甕城前後拒戰六十四日城卒完明年召還授山東宣慰使再轉知樞密院事行省平章守益都明兵壓境普顏不花力戰城陷平章保保出降普顏不花還告其母曰兒忠孝不能兩全矣有二弟養母拜母趨

官舍坐堂上主將素聞其賢召之再三不往旣而縛之
普顏不花曰我元朝進士官至極品臣各爲其主不屈
死之先是其妻阿魯眞厯呼家人告之曰我夫受國恩
我亦封齊國夫人今事至此唯有死耳家人莫不歎息
泣下已而普顏不花二弟之妻各抱幼子及婢妾投井
死比阿魯眞欲下井已不能容遂抱子投舍北井其女
及妾女孫女皆從死時有申榮者山東行省平章守東
昌榮見列郡皆降告其父曰人生世間不能全忠孝者
兒也父曰何爲榮曰城中兵少不敵戰則萬人之命由
兒而殞但有一死報國耳遂自經

閔本字宗先河內人性剛正早歲得推擇爲禮部令史
御史大夫不花奇本之才辟爲掾平反冤獄有聲擢御
史臺照磨累遷樞密院都事拜監察御史五轉爲吏部
尙書移刑戶二部本素貧且有目疾嘗上章乞謝事不
允詔授集賢侍講學士明兵薄京師本謂其妻程氏曰
國事至此吾知之久矣愧不能立功補報敢愛六尺軀
苟活哉程氏曰君能死忠我尙有愛於君乎本乃朝服
與程氏北向再拜大書於屋壁曰元中奉大夫集賢侍
講學士閔本死遂各縊二女長眞眞次女女見本死亦
皆自縊

拜住康里人字聞善累官至翰林國史院都事太子司經兵至拜住謂家人曰吾始祖海藍伯封河東公者與太祖同事王可汗太祖取王可汗收諸部落吾祖引數十騎馳西北而去太祖使人追問之曰昔者與皇帝同事王可汗王可汗今已滅欲爲之報仇則帝乃天命欲改事帝則吾心有所不忍故避之於遠地以沒餘生耳此吾祖之言也且吾祖生朔漠其言尙如此今吾生長中原讀書國學可不知大義乎況吾上世受國厚恩至吾又食祿與其苟生不如死遂赴井死其家人瘞之舍東焚其書以爲殉